

სამაგისტრო ნაშრომის წარდგენის, დაცვისა და შეფასების პროცედურა

1. სამაგისტრო ნაშრომის მიზანი

1.1. სამაგისტრო ნაშრომი არის სტუდენტის მიერ აკადემიური კეთილსინდისიერების პრინციპების დაცვით, ინდივიდუალურად შესრულებული სამუშაო.

1.2. ნაშრომში უნდა აისახოს სწავლის ან/და საქმიანობის სფეროს ღრმა და სისტემური ცოდნა, მათ შორის, ისეთი სპეციფიკური მეთოდების/საკითხების, რომელთა ძირითადი ნაწილიც ასახავს კვლევაზე დაფუძნებულ ახალ ცოდნას ან/და პროფესიულ პრაქტიკას.

1.3. სტუდენტმა სამაგისტრო ნაშრომში უნდა შეძლოს პრობლემების გადაწყვეტის ახალი, ორიგინალური გზების მოძიება, გამოავლინოს კვლევის დამოუკიდებლად განხორციელების უნარი უახლესი მეთოდებისა და მიდგომების გამოყენებით. ნაშრომში უნდა ჩანდეს, რომ სტუდენტს შეუძლია კომპლექსური ინფორმაციის (მათ შორის უახლესი კვლევების) კრიტიკული ანალიზის საფუძველზე დასაბუთებული დასკვნების ჩამოყალიბება, მონაცემებზე დაყრდნობით ინფორმაციის ინოვაციური სინთეზი და შეფასება, კვლევის დამოუკიდებლად განხორციელება. ნაშრომში შემოქმედებითად უნდა იყოს გამოყენებული თანამედროვე საინფორმაციო და საკომუნიკაციო ტექნოლოგიები დარგის თავისებურებების გათვალისწინებით.

1.4. სამაგისტრო ნაშრომის მიზანია სწავლის პროცესში მიღებული ცოდნის სისტემატიზაცია, დარგობრივი ცოდნის, პრაქტიკული და შემოქმედებითი უნარების გამოვლენა.

მუხლი 2. სამაგისტრო ნაშრომის ხელმძღვანელი

2.1. სამაგისტრო ნაშრომის სამეცნიერო ხელმძღვანელი შეიძლება იყოს თსუ-ს აკადემიური პერსონალის წევრი, რომელსაც აქვს დოქტორის ან მასთან გათანაბრებული აკადემიური ხარისხი. ნაშრომის თემას სტუდენტი ირჩევს სამეცნიერო ხელმძღვანელთან შეთანხმებით.

2.2. სამაგისტრო ნაშრომს შესაძლებელია ჰყავდეს თანახელმძღვანელიც.

2.3. ხელმძღვანელი ვალდებულია, თითოეულ სტუდენტს დაეხმაროს ნაშრომზე მუშაობის პროცესში, კერძოდ:

ა) გამართოს რეგულარული პირისპირ და/ან ონლაინ შეხვედრები სტუდენტთან ან საჭიროებისამებრ სტუდენტების ჯგუფთან;

ბ) მიაწოდოს სტუდენტს ინფორმაცია ნაშრომის მომზადების ზოგადი რეგულაციების შესახებ, მათ შორის ინფორმაცია ჯანმრთელობისა და უსაფრთხოების წესებთან (ასეთის არსებობის შემთხვევაში) დაკავშირებით, ასევე აკადემიური ეთიკის, მონაცემთა დაცვის, პლაგიატის შესახებ, აუხსნას სტუდენტს ნაშრომის მომზადების, წარდგენისა და შეფასებასთან დაკავშირებული პროცედურები.

გ) გაუწიოს კონსულტაცია კვლევის კონცეფციის შემუშავების პროცესში (მაგ.: საკვლევი საკითხის ჩამოყალიბება, კვლევის დიზაინის შემუშავება, კვლევის მეთოდების განსაზღვრა და სხვ.).

დ) დაეხმაროს სტუდენტს ნაშრომის მომზადების დროს წამოჭრილი პრობლემების გადაჭრაში.

ე) დაეხმაროს სტუდენტს ვადების განსაზღვრასა და დროის ეფექტიანად განაწილებაში, ნაშრომის შესრულების ძირითადი ეტაპების დაგეგმვაში, ნაშრომის სტრუქტურის განსაზღვრაში, კვლევისათვის საჭირო მონაცემთა მოპოვებასა და ანალიზის დაგეგმვაში.

2.4. ხელმძღვანელმა ერთდროულად შეიძლება უხელმძღვანელოს მაქსიმუმ 5 მაგისტრანტს.

მუხლი 3. სამაგისტრო ნაშრომის შესრულების ენა

3.1. სამაგისტრო ნაშრომი შესრულებული უნდა იყოს ქართულ ენაზე.

3.2. უცხოენოვანი სამაგისტრო პროგრამის სტუდენტები წარმოადგენენ ნაშრომს საგანმანათლებლო პროგრამის განხორციელების ენაზე.

მუხლი 4. სამაგისტრო ნაშრომის სტრუქტურა და გაფორმების წესი

4.1. სამაგისტრო ნაშრომი შედგება შემდეგი კომპონენტებისაგან:

1. თავფურცელი (სატიტულო ფურცელი);
2. ანოტაცია (ქართულ და ინგლისურ ენებზე თემის სათაურის მითითებით);
3. სარჩევი (შინაარსი);
4. შესავალი;
5. ტექსტის ძირითადი ნაწილი (რომელიც მოიცავს ლიტერატურის მიმოხილვას, კვლევის მეთოდების აღწერას, კვლევის შედეგებს);
6. დასკვნა;
7. გამოყენებული ლიტერატურის ნუსხა;
8. დანართები (არსებობის შემთხვევაში).

4.2. სამაგისტრო ნაშრომის მიმართ განსაზღვრება სამეცნიერო კვლევის შინაარსობრივი და ტექნიკური მოთხოვნები (დანართი #1: სამაგისტრო ნაშრომის სტრუქტურა და ტექსტის დაკაბადონების წესი), თუკი სხვა რამ არ არის დადგენილი ფაკულტეტის მიერ.

მუხლი 5. აკადემიური კეთილსინდისიერება და პლაგიატი

5.1. აკადემიური კეთილსინდისიერების დარღვევის სახეებია:

ა) პლაგიატი, რაც გულისხმობს გამიზნულად თუ უნებლიედ სხვისი ნაშრომის (იდეების, ცნებების, ფორმულების, გრაფიკების, ცხრილების, გამოსახულებების, დიზაინის და სხვა) საკუთრად წარმოჩენასა და გავრცელებას ავტორის/წყაროს შესაბამისად მითითების (საჭიროების შემთხვევაში, ნებართვის) გარეშე;

ბ) თვითპლაგიატი, რაც გულისხმობს სხვა ნაშრომში გამოთქმული საკუთარი მოსაზრებების გამეორებას ორიგინალური წყაროს მითითების გარეშე, ან საკუთარი ნაშრომის ორჯერ ან მეტჯერ წარდგენას სხვადასხვა დავალების ფარგლებში;

გ) კომპილაცია, რაც გულისხმობს საკუთარი დამუშავებისა და ინტერპრეტაციის გარეშე საავტორო უფლებით დაცული, სხვის მიერ მიღებული კვლევითი შედეგების/ნაშრომების გამოყენებას და დაჯგუფებას;

დ) ფაბრიკაცია/ფალსიფიკაცია, რაც გულისხმობს ნაშრომში მონაცემების ცვლილებას, მონაცემებით მანიპულირებას, მიღებული შედეგების შერჩევითად გამოყენებას, რაც იწვევს შედეგებისა და დასკვნების არასწორ ინტერპრეტაციას;

5.2. სტუდენტის მიერ ელექტრონულ ფორმატში წარმოდგენილი ნაშრომი პლაგიატზე მოწმდება ელექტრონული პროგრამის საშუალებით.

5.3. დაცვამდე მინიმუმ 30 დღით ადრე სტუდენტი, ფაკულტეტის მიერ ელექტრონულ პროგრამაში (მაგ.: e-Learning) საგანგებოდ გახსნილ ველში ტვირთავს ნაშრომის ელექტრონულ ვერსიას, პლაგიატზე შესამოწმებლად. პლაგიატის შემოწმების ანგარიში გადაეგზავნება ნაშრომის ხელმძღვანელს, რომელიც აფასებს ნაშრომს და პლაგიატის არსებობაზე ეჭვის გაჩენის შემთხვევაში აცნობებს ფაკულტეტს.

5.4. საჭიროების შემთხვევაში ფაკულტეტი ნიშნავს აკადემიური კეთილსინდისიერების შემოწმების საგანგებო კომისიას და ნიშნავს პლაგიატის საკითხის განხილვის თარიღს.

5.5. აკადემიური კეთილსინდისიერების საგანგებო კომისია შედგება ფაკულტეტის აკადემიური პერსონალის წევრებისგან, არანაკლებ 3 წევრისა და არაუმეტეს 9 წევრისგან.

5.6. სტუდენტს წერილობითი ფორმით ეგზავნება ინფორმაცია განხილვის თარიღის შესახებ. სტუდენტი ესწრება მისი ნაშრომის განხილვას, სადაც სარგებლობს სიტყვის უფლებით. სტუდენტს აქვს უფლება მიაწოდოს კომისიას თავის ხელთ არსებული ინფორმაცია და მტკიცებულებები საკუთარი პოზიციის დასაცავად.

5.7. კომისია იღებს გადაწყვეტილებას, რომელიც წერილობითი სახით ეცნობება ფაკულტეტის ადმინისტრაციას და სტუდენტს.

მუხლი 6. სამაგისტრო ნაშრომის წარდგენა და განხილვის ვადები

6.1. სამაგისტრო ნაშრომი დაცვამდე 30 დღით ადრე წარედგინება ფაკულტეტის ადმინისტრაციას შემდეგი ფორმით: სამაგისტრო ნაშრომი უნდა იყოს ყდაში აკინძული A4 ფორმატის ფურცელზე;

6.2. ნაშრომს თან უნდა ახლდეს ხელმძღვანელის დადებითი შეფასება სამაგისტრო ნაშრომზე.

6.3. სამაგისტრო ნაშრომის სრული ელექტრონული ვერსია (PDF ფორმატში) – CD დისკზე ჩაწერილი;

მუხლი 7. ნაშრომის რეცენზირება

7.1. სამაგისტრო ნაშრომის რეცენზირებისთვის შესაბამისი კათედრა გამოყოფს, სულ მცირე, ერთ რეცენზენტს.

7.4. რეცენზენტ(ებ)ი შეიძლება იყოს თსუ-ს შესაბამისი პროფილის აკადემიური პერსონალი, ემერიტუსი, თსუ-ს დოქტორანტი, ასევე, სამაგისტრო ნაშრომის პროფილით მომუშავე საჯარო მოსამსახურე, ვისაც აქვს დოქტორის აკადემიური ხარისხი.

ე) რეცენზენტს ნაშრომი უნდა გადაეცეს დაცვამდე არაუგვიანეს 2 კვირით ადრე.

ვ) დაცვამდე 5 დღით ადრე რეცენზენტი წერილობითი ფორმით წარმოადგენს რეცენზიას, რომელშიც ის აფასებს ნაშრომს ფაკულტეტის მიერ წინასწარ დადგენილი კრიტერიუმებით. რეცენზენტის ხელმოწერა დამოწმებული უნდა იყოს ბეჭდით.

ზ) რეცენზენტის დასკვნა საჯაროდ ეცნობება მაგისტრანტს და კომისიას.

მუხლი 8 სამაგისტრო ნაშრომის საჯარო დაცვაზე დაშვების წინაპირობა

8.1. სამაგისტრო ნაშრომი საჯარო დაცვაზე დაიშვება სტუდენტი, რომელმაც:

ა) გაიარა სემესტრული ადმინისტრაციული რეგისტრაცია და სრულად დაფარა სწავლის საფასური;

ბ) დროულად წარმოადგინა სამაგისტრო ნაშრომი და დააკმაყოფილა წინა მუხლებით გათვალისწინებული მოთხოვნები;

გ) სამაგისტრო პროგრამის ფარგლებში შესრულებული აქვს პროგრამით განსაზღვრული სასწავლო კომპონენტი.

მუხლი 9. სამაგისტრო ნაშრომის საჯაროდ დაცვა

9.1. სამაგისტრო ნაშრომის დაცვა ხდება საჯაროდ, ფაკულტეტის დეკანის ბრძანებით დამტკიცებული კომისიის წინაშე, რომელიც შედგება 5-7 წევრისგან.

9.2. მაგისტრანტის სამეცნიერო ხელმძღვანელი შეიძლება იყოს კომისიის წევრი, მაგრამ ის თავისი მაგისტრანტის პრეზენტაციის შეფასებაში არ მონაწილეობს.

9.3. ნაშრომის საბოლოო შეფასება იწერება კომისიის მიერ.

მუხლი 10. სამაგისტრო ნაშრომის შეფასება

10.1. სამაგისტრო ნაშრომი ფასდება იმავე ან მომდევნო სემესტრში, რომელშიც მაგისტრანტი დაასრულებს მასზე მუშაობას.

10.2. მაგისტრანტის მიერ სამაგისტრო ნაშრომის პრეზენტაცია ხდება შესაბამისი კომისიის წინაშე, რასაც მოჰყვება დისკუსია.

10.3. სამაგისტრო ნაშრომი ფასდება ერთჯერადად, დასკვნითი შეფასებით.

10.4. სამაგისტრო ნაშრომის კრიტერიუმებს ადგენს ფაკულტეტი.

10.5. სამაგისტრო ნაშრომი ფასდება 100 ქულიანი სისტემით.

10.6. შეფასების სისტემა უშვებს ხუთი სახის დადებით შეფასებას:

ა) (A) ფრიადი - შეფასების 91-100 ქულა;

ბ) (B) ძალიან კარგი - მაქსიმალური შეფასების 81-90 ქულა;

გ) (C) კარგი - მაქსიმალური შეფასების 71-80 ქულა;

დ) (D) დამაკმაყოფილებელი - მაქსიმალური შეფასების 61-70 ქულა;

ე) (E) საკმარისი - მაქსიმალური შეფასების 51-60 ქულა.

10.7. სამაგისტრო ნაშრომის არადამაკმაყოფილებლად (F/FX) შეფასების შემთხვევაში, მისი დაცვაზე წარდგენა იმავე სემესტრში დაუშვებელია.

10.8 სამაგისტრო ნაშრომის დაცვის შედეგი ფიქსირდება შეფასების ოქმში/უწყისში, რომელსაც ადგენს კომისიის მდივანი. ოქმს ხელს აწერს კომისიის ყველა წევრი.

10.9. დაცვიდან 2 (ორ) სამუშაო დღეში შეფასების ოქმი/უწყისი წარედგინება ფაკულტეტის სასწავლო პროცესის მართვის სამსახურს მაგისტრანტის სასწავლო ბარათში შეფასების ქულის შესატანად.

10.10. სამაგისტრო ნაშრომი, თანდართული ხელმძღვანელის დასკვნით და რეცენზიით, ინახება სამაგისტრო პროგრამის ხელმძღვანელთან/ შესაბამის სასწავლო-სამეცნიერო ინსტიტუტში/მიმართულებაზე/კათედრაზე.

მუხლი 11. გარდამავალი დებულები:

11.1. პლაგიატის გამოვლენისას, დამთხვევის 25%-ზე მეტი ოდენობა აუცილებლად საჭიროებს პლაგიატზე გადამოწმებას. 25%-ზე ნაკლები მაჩვენებელი შეიძლება უგულებლყოფილ იქნას.

სამაგისტრო ნაშრომის სტრუქტურა

სამაგისტრო ნაშრომი შედგება შემდეგი სავალდებულო კომპონენტებისაგან:

- 1) თავფურცელი (სატიტული ფურცელი);
- 2) ანოტაცია;
- 3) სარჩევი (შინაარსი);
- 4) შესავალი;
- 5) ტექსტის ძირითადი ნაწილი;
- 6) დასკვნა;
- 7) გამოყენებული ლიტერატურის ბიბლიოგრაფიული ნუსხა;
- 8) დანართები (სამაგისტრო ნაშრომს დანართის სახით უნდა ახლდეს სატიტულო ფურცლის ინგლისური თარგმანი).

თავფურცელი (სატიტულო ფურცელი):

თავფურცელი ივსება ქვემოთმოყვანილი წესის მიხედვით:

ფურცლის ზედა ნაწილში იწერება იმ უმაღლესი საგანმანათლებლო დაწესებულების სრული დასახელება, სადაც შესრულდა ნაშრომი (ივანე ჯავახიშვილის სახელობის თბილისის სახელმწიფო უნივერსიტეტის ეკონომიკისა და ბიზნესის ფაკულტეტი, შრიფტის ზომა: 16);

2-3 სმ-ის დაშორებით იწერება მაგისტრანტის გვარი და სახელი (სახელობით ბრუნვაში, შრიფტის ზომა: 16);

შუა ნაწილში იწერება ნაშრომის დასახელება (შრიფტის ზომა: 16, მას არ მიეწერება სიტყვა "თემა" და ბრჭყალებში ჩასმა საჭირო არ არის);

სათაურის შემდეგ იწერება სამაგისტრო პროგრამის დასახელება (მაგ.: სამაგისტრო პროგრამა ეკონომიკა, ბიზნესის ადმინისტრირება, ტურიზმი და ა. შ., შრიფტის ზომა: 14);

სამაგისტრო პროგრამის დასახელების ქვემოთ იწერება მისანიჭებელი აკადემიური ხარისხი, რომლის მოსაპოვებლად არის წარმოდგენილი ნაშრომი დასაცავად. (მაგ.: ნაშრომი შესრულებულია ეკონომიკის/ბიზნესის ადმინისტრირების/ტურიზმისა და მასპინძლობის მენეჯმენტის მაგისტრის აკადემიური ხარისხის მოსაპოვებლად, შრიფტის ზომა: 14);

თავფურცლის მარჯვენა ქვედა მხარეს იწერება ნაშრომის ხელმძღვანელის სახელი, გვარი, აკადემიური/სამეცნიერო ხარისხი, აკადემიური თანამდებობა (შრიფტის ზომა: 12) ;

სულ ქვემოთ, ფურცლის შუა ნაწილში, იწერება ნაშრომის შესრულების ადგილი და დრო, ქალაქი და წელი (სიტყვა "წელი"-ს გარეშე. შრიფტის ზომა: 12).

ანოტაცია

ანოტაციაში აისახება თემის მოკლე შინაარსი, მოცულობა 150-200 სიტყვის ოდენობით;

ანოტაცია უნდა დაიწეროს ქართულ და ინგლისურ ენებზე.

შინაარსი (სარჩევი) - ასახავს სამაგისტრო ნაშრომის სრული ტექსტის ყველა თავისა და პარაგრაფის ზუსტ დასახელებას თანმიმდევრულად მათი გვერდების ნომრის მარჯვენა მხარეს მითითებით. გვერდების ნუმერაცია უნდა დაიწყოს სარჩევის მომდევნო გვერდიდან თავფურცელის, ანოტაციის და სარჩევის გვერდების რაოდენობის გათვალისწინებით.

შესავალი

შესავალი წარმოადგენს ნაშრომის ზოგად ნაწილს, რომელშიც აისახება პრობლემის კვლევის მდგომარეობა, თემის აქტუალურობის დასაბუთება, კვლევის ობიექტი, მიზნები და ამოცანები, კვლევისათვის გამოყენებული მეთოდები, კვლევის სიახლეები. სასურველია შესავლის მოცულობა არ აღემატებოდეს 5 გვერდს.

ტექსტის ძირითადი ნაწილი

ტექსტის ძირითადი ნაწილი შესაძლებელია დაიყოს თავებად და პარაგრაფებად. თავები გადანიშნულია თანმიმდევრულად. პარაგრაფებს დაესმის თავისა და პარაგრაფის ნომრები. თავის დასახელება იწერება 16-იანი ზომის შრიფტით. ტექსტი შეიძლება მოიცავდეს რამდენიმე თავს, თითოეული თავი -რამდენიმე პარაგრაფს.

შესავალი, თითოეული თავი და დასკვნა უნდა დაიწყოს ახალი ფურცლიდან, ხოლო პარაგრაფების დაწყება ახალი ფურცლიდან აუცილებელი არ არის.

დასკვნა

დასკვნა წარმოადგენს სამაგისტრო ნაშრომის ნაწილს, რომელშიც აისახება ძირითადი თეორიული და პრაქტიკული შედეგები, მათი თეორიული მნიშვნელობა და პრაქტიკული ღირებულება და ასევე პერსპექტიული გამოყენების სფერო.

გამოყენებული ლიტერატურის ნუსხა

ლიტერატურის ნუსხა წარმოადგენილი უნდა იყოს ანბანური თანმიმდევრობით (ჯერ ქართულ, შემდეგ უცხოურ ენებზე). ციტირება უნდა შესრულდეს APA-სტილის მოთხოვნების დაცვით.

ტექსტის ფორმალური პარამეტრები

1. ტექსტი აკრეფილი უნდა იყოს A4 ზომის სტანდარტულ ფურცელზე.
2. შრიფტის სახე - Sylfaen
3. ტექსტის შრიფტის ზომა - 12
4. თავები/ქვეთავების შრიფტის ზომა - 16/14
5. სქოლიოს შრიფტის ზომა -10.
6. სტრიქონებს შორის მანძილი -1,5 ინტერვალი;
7. ფურცლის გვერდზე ტექსტის მინდორი: მარცხნიდან -3 სმ, მარჯვნიდან -1სმ, ზემოდან -2.5 სმ, ქვემოდან 2.5 სმ;
8. ნაშრომის მოცულობა, დარგის სპეციფიკიდან გამომდინარე, შესაძლებელია მერყეობდეს არანაკლებ 50 გვერდიდან არაუმეტეს 70 გვერდამდე (100 000-დან 140 000 ასო-ნიშნამდე) გამოყენებული ლიტერატურის ნუსხისა და დანართების გამოკლებით.